

Intervju: Wolfgang Petritsch, visoki predstavnik za BiH: "Sporazum iz Sarajeva nije u ćorskokaku i bit će u potpunosti proveden"

*Provedba dogovora u Sarajevu morat će se provesti u apsolutnom
iznosu i ništa manje od toga neće biti prihvaćeno **
Nacionalističke stranke ponašaju se neodgovorno

Nametanje bi bilo najjednostavnije

– Sporazum o provođenju Odluke o konstitutivnosti naroda u skladu sa presudom Ustavnog suda BiH nije u ćorsokaku. On nije ugrožen i ne prijeti mu propast ili odustajanje od njega. U njemu se nalaze vrlo jasne instrukcije onima koji ga trebaju provesti šta i kako trebaju uraditi. Poslanici u parlamentima su izabrani i plaćeni da to urade – kaže na početku razgovora za "Dnevni avaz" visoki predstavnik za BiH Wolfgang Petrić.

Domaći zadatak

WP: Nametanje bi bilo najjednostavnije. Ali, u ovom slučaju od suštinskog značaja je da oni političari koji su se zalagali i tražili partnerstvo sa međunarodnom zajednicom, da sada uzmu odgovornost u svoje ruke – kaže Petrić.

DA: U duhu tog partnerstva o kome govorite zar ne bi bilo fer da se uradi sljedeće: Sporazum je postignut, rezultat je dogovora domaćih političara, a Vi ga namećete. I to je partnerstvo, zar ne?

WP: Pošto još nismo došli do kraja ovog procesa, razumjet ćete da, u duhu stare dobre tradicije ovog ofisa, ne namjeravam

unaprijed objaviti nikakve korake koje ću poduzeti. Budite sigurni da ću uraditi sve što je u mojoj moći da se ovaj sporazum provede u potpunosti. To sam radio posljednja dva mjeseca. Nikada prije nisam nečemu posvetio toliko vremena, toliko dana i noći...

Nacionalističke partije ovdje se ponašaju potpuno neodgovorno. SDA je licemjerna. Oni su potpisali Dejtonski sporazum, a sada se povlače iz ovog procesa negdje na polovini puta, nisu spremni da podrže ovo, što je veliko poboljšanje tog sporazuma. HDZ je učestvovao u pregovorima samo sa jednim ciljem – da ne potpiše dogovoreno. To je jako neodgovorno.

DA: Da budemo metaforični: sporazum je kuća. Stranka za BiH najavila je da će povući potpis, a srpske stranke su usvojile drugačiju verziju od one koja je dogovorena. Je li se tek napravljena kuća srušila?

WP: Sporazum je temelj na kome se gradi ustavni dom dvaju entiteta. Taj se dom zove BiH. Krajnji rok za dovršenje kuće nije još istekao i strane imaju nekoliko dana da se taj posao uradi.

DA: Koji je to krajnji rok?

WP: On se zna – 18. april do kada parlamenti trebaju usvojiti amandmane koji onda trebaju biti ugrađeni u izborni zakon.

DA: U RS je to urađeno, ali usvojeni amandmani nisu u skladu sa Sporazumom. Hoće li se Narodna skupština morati ponovo sastajati da se urade nužne promjene?

WP: Ti amandmani nisu aktivni, da se tako izrazim, jer se čeka kakve će amandmane usvojiti u Federaciji.

DA: Pogledajte kakav je položaj Sulejmana Tihića, potpredsjednika NSRS. Nikada nije predsjedavao nijednom sjednicom?

WP: Je li mi sada govorimo o prošlosti ili o budućnosti?

DA: Govorimo o dosadašnjoj praksi u RS.

WP: I govorimo o sporazumu koji je revolucionaran. On će bitno izmijeniti politički ustroj u RS, kao što će biti slučaj sa Federacijom gdje će Srbi postati politički partneri potpuno uključeni u sistem, a isto će se desiti i sa Bošnjacima i Hrvatima u RS.

Mogu vam garantirati da će se to desiti i visoki predstavnik je garant da će rješenja dovesti do toga da su sva tri konstitutivna naroda politički faktori u oba entiteta.

Ista prava

DA: Možete li reći da u ovom slučaju predsjednik RS ne može povući nijedan važniji potez bez saglasnosti dopredsjednika?

WP: Takve garancije moraju se ustavno definirati. Radi se o vitalnom interesu koji mora biti ustavno garantiran za sve konstitutivne narode. Isto važi i za Federaciju gdje srpski član Predsjedništva ima sva prava koja imaju i ostali članovi tog tijela.

Narodima ove zemlje garantirat će se da su zastupljeni u vlasti i da učestvuju u donošenju odluka širom BiH. To je suština svih ovih razgovora koje imamo. Na kraju svega, rezultat će biti potpuna provedba sporazuma iz Sarajeva.

Antikorupcioni tim radi na slučaju "AM Špeda"

WP: Očekujem da će premijer Behmen uraditi ono što treba kako bi se razjasnila situacija u vezi s isplatom novca firmi "AM Šped". Imam potpuno povjerenje da će on razriješiti ovaj problem na ispravan način. Ne bih ulazio u detalje, ne mogu reći da li se ovdje radi o korupciji...

Do Vlade i odgovornih vlasti je da urade šta im je posao. Moj Antikorupcioni tim proučava dokumente o ovome, a, ponavljam, imam potpuno povjerenje da će premijer Behmen ovo razriješiti, da će on voditi i razriješiti cijeli slučaj na najbrži mogući

način i u skladu sa zakonom.

Budućnost HDZ-a

WP: HDZ se konačno mora suočiti s realnošću. Izbjegavanjem da to uradi, ona samo produžava stanje u kome se nalazi. Ante Jelavić i ostali koje sam razriješio nisu ljudi za budućnost te stranke.

Očito, HDZ se polahko približava spoznaji i nadam se da će konačno naći konstruktivno rješenje zbog svoje i budućnosti hrvatskog naroda. Time će se uspješno raskrstiti sa prošlošću.